

四庫全書

集部

欽定四庫全書

集部

御定歷代題畫詩類卷

三至六

詳校官侍郎_臣李封

主事銜_臣徐以坤覆勘

總校官降調編修_臣倉聖脉

校對官編修_臣盧遂

謄錄監生_臣張

泰

欽定四庫全書

御定歷代題畫詩類卷三目錄

地理類

觀華夷圖

唐伍喬

觀華夷圖

唐曹松

觀輿圖有感

元金渭五首

河山形勝圖

金雷淵

河山形勝圖

金馮壁

東山老人河山形勝圖

金趙秉文

關河形勢圖

元王惲三首

山川圖詩呈解之昂御史

元朱德潤

金陵圖

唐韋莊

觀長安城圖

宋陸游

七言和王微之漁陽圖

宋沈文通

陝西圖

宋劉叔巖三首

跋范寬秦川圖

金麻九疇

范寬秦川圖

元 元好問

秦山圖

元 王惲

題驪山圖

元 倪瓚

魯國圖

宋 謝翱

題宋復古輩洛圖

明 謝徽

觀駱元直經進江南形勢圖

宋 王庭珪

題華嶽江城圖

元 楊載

劉道傳為李遠子微作青山似洛中圖為作歌以

係之 元張翥

吳秋山寫江淮秋意 元周權

為文舉畫泖山圖因題 元倪瓚

大姚山圖 宋米友仁三首

米元暉大姚山圖 元倪瓚

題沈氏所藏石田臨小米大姚江圖 明文徵明

題海虞錢氏所藏王均章虞山圖 明吳寬

自畫吳松小崑山 明董其昌二首

看畫常州圖迎新太守

宋楊萬里

題朱元暉溧陽溪山圖

元陳旅

題倪雲林所畫義興山水圖

明高啓

為李端卿寺丞題王叔明義興山水圖

明吳寬

狼山晚晴圖

元楊維禎

荆溪圖

元鄭元祐

荆溪秋色圖為卜震亨題

元倪瓚

為王允同題陳惟允畫荆溪圖

明虞堪

題陳惟允荆溪圖

明張田二首

陳惟允荆溪圖

明王蒙

題倪元鎮畫荆溪清遠圖

明王鏊

畫吳淞山色贈潘以仁

元倪瓚

黃彌守畫吳江新霽圖

金堯懷英

題啓南過吳江舊圖

明吳寬

題因老淞江煙雨圖

宋陳造二首

桃江圖

元程鉅夫

原書葉次誤就

[illegible]

欽定四庫全書

欽定歷代題畫詩類
卷三目錄

三

御定歷代題畫詩類卷三目錄

欽定四庫全書

御定歷代題畫詩類卷三

地理類

觀華夷圖

唐
伍喬

別手應難及此精
須知攢簇自心靈
始於毫末分諸國
漸見圖中列四溟
關路欲伸通楚勢
蜀山俄聳入秦青
筆端盡現寰區事
堪把長懸在戶庭

觀華夷圖

唐
曹松

落筆勝縮地展圖當晏寧中華屬貴分遠裔占何星分
寸辨諸嶽斗升觀四溟長疑未到處一一似曾經

觀輿圖有感

五首

元金渭

朝雨茅茨濕披圖美禹功山河一掌上宇宙九疇中水
性惟趨下民生本易窮胼胝豈無事大智與天通

四載勤難繼八年績竟成

一作四履應難
辨三河尚可尋

功推城濮雋

澤想名陵深問鼎猶懷惡投龜肯易心何無微管歎孰
憶到于今

轍已環諸夏居猶憶九夷難求伐木處尚想饋豚時夾

谷真成謗中年不易知惟存刪述事赫赫起周畿一作衰

皓首陳王道時君孰可匡一作當艱難思稷契容易託齊

梁越豈資冠冕秦方用虎狼空聞歸大老不復見鷹揚

雒邑空南渡東都亦北轅已符前五閭一作運空憶後三

元世謂漢唐宋為後代分合巧相似今昔一作短長難等倫女真如拓

拔一統位一作世中原

河山形勝圖

金雷淵

高峰巨壑與天連中國關防表裏全北岸塵氛重回首
不知圖上看風煙

河山形勝圖

金馮壁

書劔丁年記昔游中條之麓過蒲州地形西控三秦遠
河勢南吞二華秋晉魏兵爭一春夢漢唐壇祀幾荒丘
披圖弔古今人慨不必重登鶴雀樓

東山老人河山形勝圖

金趙秉文

太虛匠流峙造化誰胚胎洪荒萬萬古至今餘劫灰黃

河發崑崙匣怒不敢隴初徑龍門天下險勢如萬頃納
一杯桃花浪激不得上凡魚幾曝鱗與腮下趨神睢如
地底終古不到軒轅臺滿津沉沉卧虹影鐵牛駕浪輸
黃能千里一曲復一曲傾山倒嶽不復迴巨靈為東肘
首華為崩摧茹津濟師想勝槩搔首北望令心哀萬派
赴集津鼓聲如會垓神斧忽中斷鏡鑿何年開崖傾路
斷飛鳥絕輕舟一箭浮天來篙師絕叫未及瞬回望已
失雲濤堆但見兩厓蒼蒼半天外三門斗落如驚雷擘

窠大字誰所銘高山百丈磨蒼崖廟前劉公一片石龜
龍剥落生莓苔東軒先生生長三晉地回視韓魏空浮
埃想像舊遊處落筆如山顏習中原自有河山寫出勝
概何壯哉餘波到諸郎直氣凌斗魁況復文章妙天下
睥睨晁張攀蘇梅竹帛如山不經國安用江鮑稱詩才
劉夫子我有一杯酒澆汝胃崔嵬嗚呼聖道久榛塞孟
氏闢路誅蒿萊諸儒辛苦補罅漏未見巨手如排淮後
生索塗方摘埴雖有耳目如嬰孩祝君顏波作砥柱驅

入聖海無津涯劉夫子深藏十襲作龜鑑見君此圖吁
可懷

關河形勢圖

三首

元王惲

關河百二控秦頭滿目斜陽獨倚樓設險守邦須尚德
每多吳起說文侯

秦川展掌華山高千古關河締構牢早晚去施通濟手
浮航如畫鎖驚濤

壓關樓上醉憑欄一片黃流入斷山彼索比疆俱寂寞

山河空鎖夕陽閒

山川圖詩呈解之昂御史

元 朱德潤

山川結靈根厚地東陰竅神功自模範崑崙起雙嶠層巒倚天開仰盼絕飛鳥嵐光變氣候草木通深窈東山吾舊游紈素記行橐平生丘壑情藉此寫懷抱荆關竟已矣吁吮豈真好會當躡丹梯共登天門道

金陵圖

唐 韋莊

誰為傷心畫不成畫人心逐世人情君看六幅南朝事

老木寒雲滿故城

觀長安城圖

宋
陸游

許國雖堅鬢已斑
山南經歲望南山
橫戈上馬嗟心在
穿塹環城笑虜孱
日莫風煙傳隴上
秋高刁斗落雲間
三秦父老應惆悵
不見王師出散關

七言和王微之漁陽圖

宋
沈文通

燕山自是漢家地
北望分明掌股間
休作畫圖張屋壁
空令壯士老朱顏

陝西圖三首

宋 劉叔賢

干戈今日事關塞此圖看白日長安近蒼山隴坂寒由
來名百二自古有艱難指似安西道疑情竟據鞍
萬里靈州地他年漢朔方山河從割棄闕輔急隄防轉
益豺狼窟堪嗟禮義鄉拔胡須壯士看盡意蒼茫

河源來積石天馬涉流沙耳目成千古丹青在一涯荒
涼都護府斷絕使臣槎安得山西將收功似漢家

跋范寬秦川圖

金 麻九疇

山水人傳范家筆畫史推尊為第一場來因看秦川圖
天下丹青能事畢大山巖巖如國君小山鬱鬱如陪臣
大石盤盤社與稷小石落落士與民一山一形似爭長
一石一態如布軍想君胸中有全秦見鐮削鐮乃真
掌上長安近於日千樹萬樹生青春憶昔岐山鳳皇語
蔥蔥柞械霑新雨昆夷束手密須降不見功勲見歌舞
黃金鑄牛西入焚五丁雲棧通中國驪山宮闕九天高
六處孱王走街壁不信詩書信法家關東半被魚書惑

盡卷圖籍亦大好五十年兇都一掃章邯董翳舉如毛
沐猴冠委金陵道北原兵自天而下漢室傾頽如解瓦
祁山六出縱無功渭水猶堪飲君馬螭蟠老將骨未朽
草附那能濟陽九枝瘡投鞭抵歲星歸來鹿死何人手
神武空矜賀六渾投機常落周人後竟令馮翊軟沙邊
東風一夜吹新柳侵尋卓角相料理拋擲龍津浮汴水
鷁頭過處已非隋不覺晉陽人姓李華清高宴夏宮梧
舞馬如何護兩都縱待青驪還蜀道肉得沙場白骨無

興亡自取不足吁可憐神州為盜區貪黷往古山川事
忘却題詩賞畫圖

范寬秦川圖

元
元好問

亂山如馬爭欲前細路起伏蛇蜿蜒秦川之圖范寬筆
來從馬家書畫船變化開闔天機全濃澹覆露清而妍
雲興霞蔚幾千里著我如在峨眉巔西山盤盤天與連
九點盡得齊州煙浮雲未清白日晚矯首四顧心茫然
全秦天地一大物雷雨瀕洞龍頭軒因山分勢合水力

眼底廓廓無齊燕我知寬也不辦此渠寧有筆如修椽
紫髯落落西溪君長劍倚天冠切雲望之見之不可親
元龍未除湖海氛李白豈是蓬蒿人愛君恨不識君早
乃今得子胸中秦作詩一笑君應聞

泰山圖

詩元貞元年秋九月十四
日作時賤庚六十有九

元
王 惲

秦之為山何峻雄西連太白東華峰特隆天府樹巨屏
固蓄精祐開邵封忝離變雅西周東雲煙幻出嶠函宮

不信詩書額法制百二山河纔兩世後來漢唐亦盛代
文物雖多終霸氣千年事往遺迹在留與來今鑒成敗
君不見烽燧臺羯鼓樓祖龍墓在山東頭丹青比興雅
頌作畫史固是非凡流半生薄宦走跋跋每恨西遊不
到秦我今年耄百事懶惟有懷古一念心猶存嘗聞雪
滿秦山圖天機貌畫終南真又聞髯張醉裏頭插筆灑
遍人間雪色壁西溪君范華原嗚呼二者不復作令人
氣短心茫然一朝全秦大物忽當眼著我如在龍首山

之顛卷舒巨軸閱幾年兩都喬木今蒼煙其歸有數開
有先昔藏壽國今聰山二公異世俱稱賢畫兮畫今得其傳

題驪山圖

元倪瓚

校獵上林苑洗馬昆明池霜威肅笳鼓雲氣畫車旗馬
班陳賦詠衛霍綏蠻夷王風既未遠文明方在茲逶迤
霄漢上鳳皇尚來儀

魯國圖

宋謝翱

秋風嶽下城海客見圖新樹入舞雩里水來浮磬石濱東

封餘輦路西狩問虞人被髮逢夫子狂歌作放民

題宋復古鞏洛圖

明
謝 徽

青山鞏洛舊林園髣髴昇平古意存雨外人歸秋葉浦

煙中鳥下夕陽邨昔年題字宸光合

宋思陵
題簽

今日披圖

野興繁風景西湖仍不異惟餘故老說中原

觀駱元直經進江南形勢圖

宋
王庭珪

異時漢網疎天討胡兒馬嚙江南草石頭重成豈無兵
將軍不識丹陽道至今戰骨埋秋霜傷心不忍問耆老

龍蟠虎踞昔何雄
赤壁濡須在眼中
潯陽江水射蛟處
旌旗拂天來向東
艤舳塞川不敢下
昔人曾此破曹公
橫江九道波翻屋
試請輕兵渡淮曲
夜入長安人不知
應見畫圖心已熟
他日將軍按此圖
鼓行而西如破竹

題華嶽江城圖

元楊載

華嶽能詩世有名
學畫丹青亦豪放
此圖似寫安慶城
雉堞樓臺儼相向
北風將至江面黑
千艘萬艘爭避匿
滄溟涌溢水倒流
南嶽動搖天柱側
蛟龍戲落秋潭底

素練平鋪八千里時清好作釣魚翁間弄輕舟煙霧裏
劉道傳為李遠子微作青山似洛中圖為作歌以

係之

元張翥

石頭城中有渺渺之秦淮秦淮東流入江遠其上疊巘
連層厓牛頭雙闕雲間開三山北山鬱煙靄六朝遺蹟
猶在眼千古往事徒興懷昔人謂此洛中似四面青山
圍二水劉侯熟識此景勝況復愛畫入骨髓五尺長紙
繭不如乘興破墨塗成圖漁梁茅屋昏欲無壞陵荒隴
迷楸梧

寒潮已落斷岸濶行人不渡扁舟孤
嵩邪邛邪漫漶那可辨但見招提林
杪直下藏邨墟憶我羈游石城日江
煙山雨正蕭瑟橫塘酒家好新酒醉
倚船窗看奇崛只將健句寫歸來却
恨此時無畫筆

吳秋山寫江淮秋意

元周權

江天漠漠秋無際數點淮山冷屏翠
閒拈枯筆灑松腴半幅生絹千里意

為文舉畫泖山圖因題

元倪瓚

華亭西畔路來訪舊時踪月浸半江水蓮開九朵峰酒
盃時可把林叟或相從興盡冷然去雲濤起壑松

大姚山圖

三首

宋

米友仁

廣文當日官雖冷可奈才名振世何他日君家須炙手
而今聊復雀堪羅

老年尚喜管城子更愛好山江上青武林秋高曉欲雨
正若此畫雲冥冥

三茅別有洞中天我欲山居屏世緣累行積功多蛻舉

玉宸欣有地行仙

米元暉大姚山圖

元倪瓚

大姚湖水白生煙長物都除絕世緣笙鶴不為歸鶴怨
王仙真是勝丁仙

題沈氏所藏石田臨小米大姚江圖

有序

明文徵明

長洲沈氏舊藏小米真跡成化間有假中官之勢取
之石田為追摹此圖

春雲沉空山有無眼明見此姚江圖圖窮爛漫得題字
照人百顆驪龍珠平生雅識數文書紹興歲月仍不誣
豈知尤物能媒禍繭紙蘭亭已非故石翁信是學行人
能使邯鄲還故步憶昔儉人賄為囿黷財更假狂閤手
千里珍奇歸檢括故家舊物那容守沈氏藏茲二百年
一朝掣去心茫然誰言物聚必有散手澤相關常累歎
未能一笑付亡弓且喜百年還舊觀宜余鈍眼錯顏標
抵掌真成孫叔敖區區不獨形模似更存風骨驪黃外

一時點筆迴通神得非小米是前身從來藝事關人品
敢謂今人非古人

題海虞錢氏所藏王均章虞山圖

明

吳寬

扁舟昆湖去憶向虞山還當時迫日暮未得窮躋攀至
今三短章寂寥不重刪安知六載後依然見茲山諒無
愚公愚賴有頑僊頑僊隱居處深林置柴關丹竈火常
伏藥闌苗載芟高情付縑素丹青色斑斑茲山卧平野
隱然不成環逶迤亦甚遠攢蹙何其慳咫尺見百里羣

峰互垂鬟飛鳥歸易沒浮雲出偏閣拂衣最奇麗空巖
故凝深天風或稍定石壁仍潺潺僊宮對佛寺妙境非
人寰獨憐仲雍墓誰為前刀榛管短棹載書卷浩歌水雲
間芳髯歸菴翁往來寶嚴灣竊祿本無補乞身亦多艱
卧游畢舊願坐嘯開塵顏

自畫吳松小崑山

二首

明
董其昌

崑山雖婉孌却似魯家丘故作廬峰勢青天瀑布流
夜游西園渚初月光炯炯徙倚巖石上愛此林木影

看畫常州圖迎新太守

宋 楊萬里

畫工吮筆畫常州老子來看却自羞若遣此圖還解語
道儂調戲幾君侯

題米元暉溧陽溪山圖

元 陳旅

宿雨散層巘林麓翳煙霏遙山斷復連川上初晰微我
昔困行役溧陽秋未歸幽子喬松流邂逅啓郊扉撫景
正若此別離嗟願違覽卷遂終日溪雲欲生衣

題倪雲林所畫義興山水圖

明 高啓

嘗吸陽羨茗不遊陽羨山銅宮結秀色都在畫圖間樊
川醉遊處水榭依沙樹雲入縣城來溪流太湖去我愛
雲林生高歌無俗情石庭梅欲發須放酒船行

為李瑞卿寺丞題王叔明義興山水圖

明
吳寬

陽羨山深懶杖藜卧游三日路仍迷雲中望見乘舟者
始識遙通菴畫溪

狼山晚晴圖

元
楊維禎

樵東風雪夜無邊一別狼山已幾年今日江南攜畫看
玉峰十二倚青天

荆溪圖

元鄭元祐

荆溪溪上首重迴豈意人間化劫灰只有斬蛟橋下水
可曾寫入畫圖來

荆溪秋色圖為卜震亨題

元倪瓚

畫盡溪頭春水明上人逸筆思縱橫雲山多少玄暉句
不道毫端畫得成

為王允同題陳惟允畫荆溪圖

明 虞 寬

好山都在太湖西
滿路風煙棘刺迷
華屋燕飛今在否
市橋官柳不勝題

題陳惟允荆溪圖

二首

明 張 田

人家綠樹繞孤城
溪上風波落日明
三害祠存人已去
只今豺虎却縱橫

歷亂茆堂草樹深
隱居蹤跡杳難尋
只應獨自攜琴去
小峇松篁太古音

陳惟允荆溪圖

明王蒙

太湖西畔樹離離故國溪山入夢思
遼鶴未歸人世換
歲時誰祭斬蛟祠

題倪元鎮畫荆溪清遠圖

明王燦

銅官山下縱清遊每為餐松十日留
吹斷玉簫人去久
暮雲空鎖洞庭秋

畫吳淞山色贈潘以仁

元倪瓚

吳淞春水綠搖蕩半江雲漁舟衝雨出
松聲渚際聞
潘

郎狂嗜古容我醉書裙鼓柁他年去相從遠俗氛

黃彌守畫吳江新霽圖

金
完懷英

江雲卷宿雨江風散晨煙山光煙雨潤欲滴影墮江水
空明間脩蛾新妝翠連娟下拂塵鏡窺明鱗漁舟來何
許觸破青茫然中流水肥魚逆上受網應有松鱸鮮借
問張季鷹西風幾時還漁郎理網喚不應但見水碧江
涵天如何塵埃中眼界有許寬道人胸次波萬頃為寫
此境清而妍蒼崖無塵樹影寒直欲坐我苔磯邊我家

竹溪陰小艇橫清漣異時赤脚踏兩舷不應尚作披圖看

題啓南過吳江舊圖

明 吳 寬

吳淞江腹太湖頭霓連路卧碧流我昨經行覺尤勝
滿船明月下滄洲

題因老淞江煙雨圖

二首

宋 陳 造

遠峰近薄鑑中浮每泊行舟十日留雨望晴臨俱不惡
最憐煙靄暝高秋

千里湖山宿霧昏倚欄一筆解平吞漁郎好在收綸罷

想踞岑甯共一樽

桃江圖

元程鉅夫

大仰山前宿雨餘
桃枝江口正樵漁
何人乞得身無事
賸買雲山小結廬

御定歷代題畫詩類卷三

欽定四庫全書

御定歷代題畫詩類卷四目錄

地理類

奉觀嚴鄭公廳事岷山沱江畫圖十韻得忘字

唐

杜甫

嚴公廳宴同詠蜀道畫圖得空字

唐杜甫

題蜀道圖

宋晁說之

題蔣永仲蜀道圖

宋程俱

張道士蜀山圖

元虞集

王晉卿蜀道寒雲圖

元鄧文原

王晉卿蜀道寒雲

元吳鎮

題關山圖

元唐肅

蜀山圖

明貝瓊

劍門圖

元傅若金

劍閣秋陰圖

明林鴻

劍閣圖

明王景彰

蜀江圖

元 袁桷

黃荃蜀江秋淨圖

元 吳鎮

題蜀江雨霽圖

明 藍智

酬雍才貽巴峽圖

唐 薛氏

題蕭梅初舊所藏錢塘王畿圖

宋 鄭思肖二首

周漢長公府臨安故城二圖

元 張翥二首

題江南秋晚圖

明 王景彰

題錢塘勝覽圖

明 盧大雅

題米元暉吳興山水橫卷

宋范成大

為秋堂題錢舜舉所畫吳興山水圖

元陳泰

題申居士雪溪圖

宋韓駒

懶拙道人苕溪曉望圖

元張翥

米元暉苕溪春曉圖

明楊基

米元暉苕溪春曉圖

明劉敏

米元暉苕溪春曉圖

明胡隆成

苕溪春曉圖

明吳倫二首

秋日為方爾玉丞寫茗源圖

明李日華

蕭山圖

元程鉅夫

山陰春霽圖

元張翥

題彥敬越山圖

元趙孟頫

題高彥敬越山圖

元吳師道

越山清曉圖

元貢性之

題柴昆陵越山春曉圖

明李孝謙

越山圖為孫山人賦

明廖道南

題魯易之四明山水圖

元余闕

題三衢山水圖

明丘濬

陵陽春晚圖

明王翰

御定歷代題畫詩類卷四目錄

欽定四庫全書

御定歷代題畫詩類卷四

地理類

奉觀嚴鄭公廳事岷山池江畫圖十韻得忘字

唐
杜甫

池水臨中座岷山到北堂
白波吹粉壁青嶂插雕梁
直訝杉松冷兼疑菱荇香
雪雲虛點綴沙草得微茫
嶺鴈隨毫末川蜺飲練光
非紅洲蕊亂拂黛石蘿長
暗谷非

關雨丹楓不為霜秋成玄圃外景物洞庭傍繪事功殊絕幽襟興激昂從來謝太傅丘壑道難忘

嚴公廳宴同詠蜀道畫圖得空字

唐

杜甫

日臨公館靜畫列地圖雄劍閣星橋北松州雪嶺東華夷山不斷吳蜀水相通興與煙霞會清樽幸不空

題蜀道圖

宋

晁說之

山鈎樹白何年歲流瀑可聽下無地行人愁絕却無愁始信宜歌蜀道易

題蔣永仲蜀道圖

宋程俱

梓州別駕真雛鳳賞古探奇坐飢凍要窺瓊宇蔚藍天
直上潼江歷秦宋每逢佳處靜盤礴流出胸中九雲夢
乾坤塊扎本無迹我獨毫端發神用戲驅萬竊寄陶寫
軒豁端倪巧搏控蒼筠擢秀飽冰雪古榦撐空中梁棟
奇礪那得在山谷回首何年委堅重輪囷偃蓋屈金鐵
大矯驚則起巖洞春江莽蒼迷東西漢南老柳參差垂
煙中遠近見木末明星已沒城烏啼平生險怪三峽水

古木龍從陰風吹石間雷電殷九地出入噴薄無窮時
我身所足半天下偃蹇故是山林姿南行濡霍北嵩洛
應接不暇空狂癡作詩寫意如捕景況有三絕窮天機
清晨對此恍自失眼中太白橫幾嶺請君什襲秘緹車
恐復仙去歸無期

張道士蜀山圖

元虞集

碧玉參天是蜀山舊曾飛度歷屨顏松風上接空歌外
蘿月長懸合景間試劒丹崖秋隼疾濯纓清澗夜龍閒

君家虛靖歸來日冉冉蓬壺為憶還

王晉卿蜀道寒雲圖

元 鄧文原

巨靈何年移五岳石扇中開兩厓削峽中六月清風寒
仰視青冥何漠漠碧溪屈曲通冷泉紺葉玲瓏帶籬落
勾連石棧不可梯縹緲煙中見樓閣行行遊子幾經年
幾度空林愁夜鶴仙峰歷覽豈不嘉還憶白雲舊巖壑
江城過雨秋氣涼時有疎鐘度寥廓山林如此誰能為
都尉丹青深問學當年故習一銷鎔三百餘年無與角

君家珍祕在雲房六時展對忘離索我詩渠畫相後先
固應不負三生約

王晉卿蜀道寒雲

元 吳 鎮

蜀道何年闢猿猱若畏攀雲依古木靜梵唄禪關門野
店市未散斜傍河梁間行人自南北飛鳥互往還雞鳴
遍邨落舟行溜潺潺青松紛滿目夕陽并在山誰云畫
圖表徒然見一斑

題關山圖

元 唐 肅

羊腸盤盤走青泥，關門晝開與天齊。
行人望天天可梯，只愁猿吟鷓鴣啼。
鷓鴣啼時車輓輓，猿吟復斷車未宿。
試問山靈有山來，幾車安行幾車覆。
我脚未知蜀道難，何物畫圖使心酸。
莫嗟蜀道險如此，中原崎嶇不受履。

蜀山圖

明
貝瓊

連峰接岫寫秦州，雨洗峨眉積翠浮。
石出劒門皆北向，水通鹽澤自西流。
松頭一片秋雲濕，鳥背千盤細路幽。
策馬匆匆度關客，何如漁父一扁舟。

劍門圖

元 傅若金

劍門天下險亦復天下壯
崢嶸扼西南氣欲軋萬象
石壁摩往來風湍東奔放
深蟠虛無底峭出日月上
二儀含嵒嶽萬古設眺望
一夫或當關強敵不敢傍
胡為昔人國恃此亦傾喪
聖朝今無外皇化極浩蕩
勢狹秦漢爭治同唐虞讓
乃知不在險六合德可王
前年南中行其地少平曠
縣車度重隘東馬下疊嶂
翻疑蜀道坦劍閣固殊狀
及此觀畫圖間闕愁西向
浮雲從中來日暮

一惆悵

劔閣秋陰圖

明林鴻

分野秦封盡山川蜀國雄塹江流地底劔閣起天中棧
險崖頻轉蘿深月不通飛揚慙白帝開闢憶蠶叢氣候
三秋異猿聲衆壑同棟雲常礙日巖樹遞呼風客路隨
飛鳥鄉心挂落楓茲非曠達士應此泣途窮

劔閣圖

明王景彰

劔閣雲棧高嵯峨嘉陵江水揚清波神扃鬼鑿闕幽闌

秋風古道無人過一朝日華忽西被宇宙淋漓盡元氣
霆轟飈舉神龍迷山川草木皆生意乃知世道有晦明
蜀山萬仞如砥平聖人在位四海清

蜀江圖

元
袁楠

三峽盤渦豔瀕堆層巒百丈鼓聲催從今盡向金牛路
杜宇深啼喚不回

黃荃蜀江秋淨圖

元
吳鎮

莫煙漠漠一江秋踈樹依稀見遠舟風度鐘聲來古寺

人隨鴈影過前州雲銷碧落天無際波撼黃山地欲浮

應識箇中清絕處成都畫史筆端收

明
藍智

題蜀江雨霽圖

瞿塘雨過起春瀾空翠樓臺香謁間萬里橋西花似錦

暮雲依舊隔巫山

唐
薛氏名清

酬雍才貽巴峽圖

千疊雲峰萬頃湖白波分去遶荆吳感君識我枕流意

重示瞿塘峽口圖

題蕭梅初舊所藏錢塘王畿圖 二首

宋 鄭思肖

陰山戎馬蹂京塵，鎖殺宮花不識春。
哭問錢塘江上月，如今誰是去邠人？

撫膺唁國問蒼蒼，嘆喟聲中喜氣昌。
偷報故都忠義士，趙家天下又南陽。

周漢長公府臨安故城二圖 二首 元 張翥

主家樓觀鬱參差，想見當年全盛時。
宮草細侵行輦路，

苑花深覆泛舟池
瑤臺仙去塵生海
甲帳神來風滿旗
好在畫圖留勝蹟
五雲長護鶴笙祠

南渡君臣建業偏
不堪喬木黯風煙
豈知白馬興王後
又到紅羊換劫年
三輔黃圖空郡國
六朝王氣渺山川
白頭開府歸來日
應覽遺蹤一愴然

題江南秋晚圖

明 王景彰

十年不踏錢塘路
江上晴煙渺輕素
并刀誰剪秋半簾
夕陽正在西陵樹
對之便欲發浩歌
西風蕭蕭水增波

金史卷四
卷四
胥濤已入亂山去木落臺空幽思多

題錢塘勝覽圖

明
盧大雅

南渡衣冠委草萊危亭高處海門開雲霞都邑雄中國
月露軒窗逼上台春夢已隨流水去寒潮自領夕陽來
小樓題畫因惆悵豈獨昆明有劫灰

題朱元暉吳興山水橫卷

宋
范成大

道場山麓接何山影落苕溪浸碧瀾只欠荷花三十里
櫂頭船上把漁竿

為秋堂題錢舜舉所畫吳興山水圖

元 陳 泰

畫師小景如傳神自昔水墨無丹青老錢變法米家譜
妙在短幅開煙屏煙屏咫尺互明滅赤城霞起山陰雪
松風四月五月時坐定還宜棹歌發秋堂吏隱當洪都
對畫却憶蓴絲鱸吳興山水雖可摹老錢丹青今世無

題申居士雪溪圖

宋 韓 駒

雪溪居士買山圖碧玉峰前碧玉湖中有一丘容我老
暮年居士肯分無

懶拙道人苕溪曉望圖

元張翥

憶昔薄游苕之城溪光近秋山曉晴連峰接嶂望不及
惟有白雲縱復橫漁邨無林樹墨色微風忽起菰蒲聲
月從太湖東畔出直射西塞山前明人家碧玉壺中住
野舫銀河天上行酒酣時起發長嘯水底直遣魚龍驚
老暉向亦此盤礴安知今我非三生盡搜萬象入奇筆
畫與詩境俱崢嶸吾家苕中有茅屋京塵滿鬢難為情
頓令扁舟夜入夢萬頃鷗波歸濯纓

米元暉苕溪春曉圖

明楊基

碧瀾堂下看鷗波，曾記蘭舟向曉過。
滿寺白雲春樹少，兩溪微雨落花多。
蒲光煖，泛煙光，濕草氣濃兼水氣。
和欲向畫圖尋舊蹟，老懷無計奈愁何。

米元暉苕溪春曉圖

明劉敏

渺渺煙蕪漾曉波，餘才叨祿每曾過。
揚帆估客凌晨少，擊榜漁舟出浦多。
山寺雨晴雲氣黯，溪亭風暖鳥聲和。
披圖好似蒼茫意，景想前人奈遠何。

米元暉茗溪春曉圖

明 胡隆成

米家名畫可誰論
愛此茗溪春曉邨
五色昔經虹下貫
百年俄與氣俱昏
酒香春葉文魚出
歌起滄浪白鳥喧
料得意行隨遠近
展圖思憩樹陰繁

茗溪春曉圖

二首

明 吳倫

夜聽溪上雨
曉看溪上山
雨歇山更佳
尚在空中濛
間白雲掩疎鐘
綠樹迷遠島
居人想未起
邨邨自啼鳥

秋日為方壘丞寫茗源圖

明 李日華

昔從茗上過面面是雲峰水何高巖落橋將絕澗通岬
花秋點綴崖樹畫冥濛此地神仙窟曾經住葛翁

蕭山圖

元 程鉅夫

迴首江西最上

闕一字

山隨人性尚為蕭客行天下三十

載家住溪山第幾橋日冷雲松朝漠漠月明風谷夜迢迢
追夢回枕上聽春雨記著東園長樂苗

山陰春霽圖

元 張翥

簾畫溪頭春水波美人蘭橈遠來過杯如賀老搗山酒

曲有吳兒小海歌樓館雲晴空翠濕汀洲花暗夕陽多
只今粉墨餘高致愁絕樵風冷薜蘿

題彥敬越山圖

元趙孟頫

越山隔濤江風起不可渡時於圖中看居然在煙霧

題高彥敬越山圖

元吳師道

潮平風定日落雲白山青雨乾憶得晚秋天氣浙江亭

上凭欄

越山清曉圖

元貢性之

曙光晴散越王臺萬壑千巖錦繡開歌枕僧鐘雲外落
卷簾漁唱鏡中來樹藏茅屋雞聲斷露濕松巢鶴夢回
安得畫圖分隙地移家仍住小蓬萊

題柴昆陵越山春曉圖

明
李孝謙

君莫著謝公登山屐更莫問子猷泛雪舟請君試看高
堂壁髣髴李白天姥夢中遊於越山川甲天下秦關蜀
道皆土苴柴侯晚年天機精酒酣潑墨為予寫天姥高
出東南天天台四明相蟬聯影落平湖一鑑靜正對賀

老山莊前近山青青遠山小煙霧冥濛漲春曉雲間日出似聞鐘
邪溪樹綠應啼鳥鳥啼不可聞林深不見雲只疑空青四山合
倏訝飛瀑雙崖奔極知妙手奪天造真宰上訴天應笑獨脚山魈
作鬼精偷向靈巖拾竒草水竹江花何處灘漁郎翠蓑露未乾青
帘酒家石橋右艤舟却憶姚江千長松之下一片石竹杖芒屨二三
客幌巾高挂白雲邊醉倚青天翠如碧

越山圖

為孫山人賦

明
廖道南

越王山中春鳥鳴越王臺下晴嵐生溪流十里龍湫香
湖水半灣鷗嶼明何年卜築何茲土青山四面當軒戶
疎松偃蹇干層霄脩竹檀欒宿深雨我聞山人孫思邈
春來瑤圃栽仙藥洞裏丹經封石函牀頭素帙披風壑
山人有子皆俊英元方供奉白玉京仲也清姿抱奇特
季子懋學揚芳聲繫昔尚平負遐志五嶽尋真了無累
矧茲蘭玉滿秋堂仰視浮雲小天地此心自足夫何圖
昔我非我今故吾禹穴冥探望東海胥潮晴泛游西湖

遙望蓬萊散霞綺金宮貝闕含蒼紫安期美門相為徒
飈馭雲車千萬里噫嘻吁飈馭雲車千萬里

題魯易之四明山水圖

元余闕

窗中望蒼翠春木起晨霏孤嶂纔盈尺長松未合圍蕭
蕭此仙客日日候巖扉念爾空延佇王孫且未歸

題三衢山水圖

明丘濬

我聞太末之區富山水形勝東南獨專美一川素縠皺
秋紋萬疊銀屏絢霞綺九龍作臣青翠深金溪迢遞來

鴉金婺女鏡臺雲裏現偃王玉研水中沉山趾依依僧
寺小湖心泛泛漁舟杳石橋野色曉平分古壁雲根寒
不老長松落落幾丈強深林灌木相低昂綠蘿暗挂千
巘雨白瀑晴飛百道霜碧沙翠竹江邨路何人結屋依
雲住得非龍丘養高所無乃安貞讀書處讀書不干萬乘
君黃冠野服甘隱淪興來垂綸釣綠水醉後荷鋤鏡白
雲白雲深處多幽侶一笑相看興容與有時綴席聯詩
篇有時對酒談今古山中之樂樂不窮髣髴尚有太古

風古風遼邈不可復坐對此圖懷此翁此翁今年年幾
許白首林泉無恙否幾欲為賦招隱篇招之不來奈何
汝也知不是忘世人教子已見登青雲唐虞在上有巢
許山靈不用重移文

陵陽春晚圖

明王翰

陵陽山下林亭好更有高人為卜鄰幾箇修篁鳴翠雨
一溪流水隔紅塵靈龍過礧能迎客幽鳥到窗如喚人
少住梁園驚歲月春來頓覺夢歸頻

欽定四庫全書

御定歷代題畫詩類

御定歷代題畫詩類卷四

欽定四庫全書

御定歷代題畫詩類卷五目錄

地理類

觀明州圖

宋王安石

虔州八境圖

宋蘇軾八首

題馬遠信州圖

元納延

康州圖

明陸弼

高彥敬黃州雲山圖

元馬祖常

題王仲弘縣尹所藏高彥敬尚書已陵山水圖 元

郊韶

西江圖 元吳師道

張司徒所畫山國圖歌 明顧璘

楚山秋曉圖 金劉迎

跋伯玉命簡之臨米元章楚山圖 金麻九疇

楚山清曉圖 元元好問

題洪谷子楚山秋晚圖 元鄧文原

米敷文楚山清曉卷

元鄧文原

普照寺楚山圖

元郭畀

題楚山春曉圖

元文矩

荆洪谷楚山秋晚圖

元黃公望

洪谷子楚山秋晚

元吳鎮

楚山清曉圖

明李日華

題米元暉楚江清曉圖

元王惲二首

題楚江清曉圖

元丁復

題楚江清曉圖

元鄭東

題楚江秋曉卷

元韓奕

題楚江秋曉卷

元胡奎

題燕穆之楚江秋曉圖

元俞行之

燕穆之楚江秋曉圖

元秦衡

燕穆之楚江秋曉圖

元沈應

題楚江秋曉卷

元賀言

題趙松雪楚江清曉

元于立

題楚江秋曉卷

元吳文泰

題燕穆之楚江秋曉圖

元瞿政

題燕穆之楚江秋曉圖

元曹恕

題楚江秋曉卷

元僧普震

題楚江秋意圖

明楊基

楚江清遠圖

明張羽四首

題燕穆之楚江秋曉圖

明陳寬

楚江晴曉圖

明吳文恭

題鄭德彰員外所藏高彥敬畫楚江春曉圖

明藍

智

楚江秋曉卷

明沈周

楚雲湘水圖歌

元龔璘

題晴川圖

元岑安卿

清江圖

元貢性之

題洋江林彥禎所藏洋江春晚圖

明陳亮

太平寺水

宋楊萬里

題馬遠十二水

明王世貞

遠覽圖

明廖道南

江皋圖

明李延興

御定歷代題畫詩類卷五目錄

欽定四庫全書

御定歷代題畫詩類卷五

地理類

觀明州圖

宋

王安石

明州城郭畫中傳尚記西亭一艤船
投老心情非復昔當時山水故依然

虔州八境圖

八首

宋

蘇軾

坐看奔灘繞石樓使君高會百無憂
三屏竊鄙秦太守

八詠聊同沈隱侯

濤頭寂寞打城還
章貢臺前莫靄寒
倦客登臨無限思
孤雲落日是長安

白鵲樓前翠竹堆
營雲嶺路若為開
故人應在千山外
不寄梅花遠信來

朱樓深處日微明
早蓋歸時酒半醒
薄暮漁樵人去盡
碧谿青嶂繞螺亭

使君那暇日參禪
一望叢林一悵然
成佛莫教靈運後

著鞭從使祖生先

却從塵外望塵中無限樓臺煙雨濛山水照人迷向背
只尋孤堦認西東

煙雲縹緲鬱孤臺積翠浮空雨半開想見之罍觀海市
絳宮明滅是蓬萊

回峰亂嶂鬱參差雲外高人世得知誰何空山弄明月
山中木客解吟詩

題馬遠信州圖

元納延

昔解靈溪纜相將下信州人家臨水岸鼓角起城頭雲
積龜峰雨江分蠡澤秋開圖見山郭千里思悠悠

康州圖

明陸弼

亂山無徑不通樵漁舍陰陰映綠蕉樹杪泥乾江水落
邛邊沙白瘴煙消

高彥敬黃洲雲山圖

元馬祖常

雲山萬疊江南岸江北高樓眺望時晴靄蔽虧橋過市
夕霏蒼蔚樹連枝行人不帶遮塵帽遊客嘗攜注酒卮

我有故園淮水上竹岡相接到黃陂

題王仲弘縣尹所藏高彥敬尚書已陵山水圖

元 郊 韶

尚書愛畫山落筆生遠色微茫洞庭野迴與湘渚隔青
山迤邐盤春空江波欲落江水重望中雲夢開七澤猿
啼直與已陵通王郎家住已陵道按圖只說已陵好已
陵女兒歌竹枝微風落日行入少山中春雨生石田柴
門流水聲濺濺釣竿長日倚沙樹扁舟中閣生晴煙愛

此只合山中住十年作官不歸去高堂見畫夜夢之墓
中離離濕秋露白頭官滿思轉多江南酒美仍蹉跎人
生得意夜行樂酒酣且和巴陵歌王郎王郎奈爾何

西江圖

元 吳師道

西山翠湧大江流歷歷開圖記昔遊寂寞滕王舊時閣
秋風斜日下城頭

張司徒所畫山國圖歌

明 顧璘

滇南一道盤雲上永昌魏魏更西望水流直入洱海深

陸地芙蓉矗相向小石紛磊磊大石高盤陀連空互撐
疊仰睇青嵯峨攢峰插斗斗飛澗懸天河崩崖傾斷下
無地但見猿猴挂胃號煙蘿丹砂空青的皪巖阿寶玉
夜炯靈光盪摩天門洞開紫宮逶迤玉女對侍星官駢
羅至高之極始見此遼絕下奈諸方何馬蹄緘鐵尚不
得度行人跛鼃焉能過我生水國多見水不圖山高乃
如此畫家山水貴相半吁嗟誰悉寰區理南園大老司
徒公維山降神為世雄晚張能事發新格盡吐硯礪之

心胃引緣迅埽鳴長風顛林倒壑貌不同蒼雲黯慘喧
霹靂白日照耀開鴻濛蛟龍盤拏古木死蟬蛻漂疾飛
梁通千巒萬嶂堆墨華忽然平曠披風沙襟榆開鑿嵩
君國桃源點綴秦人家孤城四面削玄壁危樓仄立明
丹霞時清頗知官府靜化遠亦愛蠻夷嘉老翁戲獵逐
黃犬嬌女明妝簪素花形勝分明在指顧風俗想像增
咨嗟騰衝靡莫餘千里部落微茫分遠邇更揮淡墨灑
餘姿遂使天涯窮尺紙昨逢伯子示此圖瞠目驚歎從

前無乃知山嶽氣磅礴不用濫漫談江湖今之好山有
二老太原司馬吳門都見此寄書定相索公乎公乎須
寫數本萬里絡繹傳吾徒

楚山秋曉圖

金劉迎

山娟娟江茫茫緣山林木老已蒼穿林細路縈羊腸汀
洲人家蘭杜香兩山秀出江中央宛如雙劍森鋒銳層
巒架空化竇坊塢波突兀一氣傍雞聲喔喔林鳥翔顧
瞻曙色開東方清風宿霧方蒼涼兜羅繚網淡平野紫

磨金餅暎扶桑櫓聲才動欲離岸鐘韻已殘猶殷牀當年有朱維楚狂生子亦復肖阿章想從乃翁住朝陽收拾山綠餐湖光膝前翰墨觀琳琅此圖戲出遂擅場彼衆史者何敢當不然安得牙籤犀軸古錦囊賞覽一朝蒙古皇

跋伯玉命簡之臨米元章楚山圖

金麻九疇

已東峽壁如駮霞天鑿荆門當虎牙下有奔湍沉碧沙直衝北固如投家雲煙昏曉互明滅朗看沃日莫吞月

遠山如指近如拳過客那知空一瞥高人廬此恨來晚
不厭孤蓬疊往返莫言造物好窮人許大乾坤富君眼
以心為鏡照諸山山如人面紛殊顏扁舟日日青山上
青山却在滄波間人道癡兒固貪取我怪高人亦如許
已將胃次衽長江更把豪端扛巨楚薺列楓林葉浮舸
巧促魁梧入么麼文尋收拾無邊春千里遊遨坐中我
自此頭吳尾甌越蠻煙五月髡人髮江山多處乃爾毒
始信中原天下甲楚山可覽不可上水氣昏昏且多恙

畫山縱不到真山有楚之峰無楚瘴靜明居士見山饒
想在庵中得飽參戲呼老李臨君畫已坐君貪我更貪

楚山清曉圖

元 元好問

雨潤煙濃十二峰雲間合有楚王宮遙知別後西州夢
一抹春愁淺淡中

題洪谷子楚山秋晚圖

元 鄧文原

舊知洪谷古先儔五尺橫圖見十洲千嶂排空青玉立
一江流水白雲浮瑯簷共話當年雨丹葉誰憐滿徑秋

最是無聲詩思好恍然身在赤城遊

米數文楚山清曉卷

元 鄧文原

濛濛煙樹楚江濱寂寞漁郎護短籬雲夢舟中春睡足
醉餘猶記牧之詩

普照寺楚山圖

元 郭 畀

白衣處士息羣機高閣登臨送夕暉吳地荒涼征馬盡

楚山空闊斷鴻飛畫

一作圖

間塢影來朱戶月落鐘聲隱

翠微直下先人敝廬在暮年蓮社得相依

題楚山春曉圖

元文矩

荆門雪霽江樹芳巫峽冉冉愁雲長山猿杜鵑叫落日
風灑路沐何蒼涼六龍從東來曉氣開扶桑天高雨絕
人事變解環結佩空相望渚宮西溼連三湘畫中隱隱
聽鳴榔安得置我淒其旁為君一曲歌滄浪

荆洪谷楚山秋晚圖

有序

元黃公望

洪谷子有云吳道子畫山水有筆而無墨項容有墨
而無筆吾當采二子所長成一家之格以此則知其

未嘗不好古而亦未嘗不好學今太樸先生近
購所畫楚山秋晚圖骨體夔絕思致高深誠有合於
斯語非南宋人所得夢見也因賦以短句

天高氣肅萬峰青
冉冉雲煙滿戶庭
選僻忽經黃葉下
樹荒猶聽午雞鳴
山翁有約談真訣
野客無心任醉醒
最是一窗秋色好
當年洪谷舊知名

洪谷子楚山秋晚

元吳鎮

洪谷仙去五百年
丹青流落何翛然
九疑之山何突兀

亂雲慘澹秋風前尋幽忽有蓬萊仙
歌聲隱約清溪邊蕭蕭木葉下無際
不見歸來張季船前邨後邨高復下
遠渚近渚斷又連夕照遲遲俯西川
樹底人家起碧煙卷中妙境無窮已
揮毫聊爾紀新篇

楚山清曉圖

明 李日華

門前溪曲流花遠屋後山高見月遲
剛道巫雲多旖旎楚山偏覺富情思

題米元暉楚江晴曉圖

二首

元 王 惲

元暉筆力儘清雄兩岸青山似越中
六鑿近年攘欲盡
蒼煙無復曉冥濛

江邊墟落靜荒煙林鴟依然井臼全
若比石壕更瀟灑
入山多避過都錢

題楚江清曉圖

元 丁 復

海色澄明霞欲生白煙樓閣靜崢嶸
青楓江上船已發
苦竹嶺頭人未行

題楚江清曉圖

元 鄭 東

樹碧江寒日出遲青山雲起亦多時幾回船屋緣貪睡
佳氣朝來竟不知

題楚江秋曉圖卷

元 韓奕

蒼茫巫峽曉搖落楚天秋神女千年廟商人萬里舟詩
中曾想賦畫裏毋思遊江海平生志窮經老一丘

題楚江秋曉卷

元 胡奎

日出楚山碧照見龍鱗波扁舟何處即解唱竹枝歌神
女朝雲裏啼猿秋樹多蒼梧望不極遠意當如何

題燕穆之楚江秋曉圖

元 俞行之

本自為農住一丘，却攜書劍歷河洲。
龍門碣石尋常到，鴈宕天台汗漫游。
風舸順流如驟馬，人生隨處若浮鷗。
夜來又作江湖夢，剩水殘山總是愁。

燕穆之楚江秋曉圖

元 秦 衡

幾聲哀角起寒蕪，一夜清霜脆柳條。
浦嶼未明滄海日，客帆應發楚江湖。
山經太白西來險，鴈轉衡陽北去遙。
愧我無才重弔屈，忠魂千古有誰招。

燕穆之楚江秋曉圖

元 沈 應

曾記蒹葭水廟東客心爭渡曉雞中平蕪落月三湘路
千里孤舟一鴈風別去鄉關猶在夢老來江海尚飄蓬
何因得似閒鷗鳥兩兩沙邊睡正濃

題楚江秋曉卷

元 賀 言

月落楚江空秋林待日紅船開飛葉雨人渡長潮風閣
影濤聲外山形曙色中神仙問何在有路想難通

題趙松雪楚江清曉

元 于 立

曾從江上繫孤舟
渺渺清江萬里流
兩岸青山春正曉
一聲鳴櫓下揚州

題楚江秋曉卷

元 吳文泰

碧水連空入望深
匡廬秋色正蕭森
曙分已峽猿聲斷
月落湘潭鴈影沉
宿霧收邊橫荻渚
炊煙起處隔楓林
何因得似歸來棹
笑傲衡門自楚吟

題燕穆之楚江秋曉圖

元 瞿 昉

木落秋江露濕衣
放舟有客候潮歸
煙霞勢鬬天將曙

星斗升沉影漸稀
避弋鴈鴻投渚宿
忘機鷗鷺傍人飛
巫山巫峽曾登覽
猶憶題詩在翠微

題燕穆之楚江秋曉圖

元曹恕

空江煙霧曉微茫
潮落沙寒洲渚長
颿拂曙光開夢澤
鴈將秋色渡瀟湘
荻花團露輕盈雪
楓葉迎霞遠近霜
倚棹令人添遠思
漁歌欸乃起滄浪

題楚江秋曉卷

元僧普震

楚江秋向曙
畫裏景依然
旭日浮波面
涼風動樹顛
同

來桃葉渡相並木蘭船欲問西洲信得陽何許邊

題楚江秋意圖

明楊基

萬里巴江入海流水空天濶鴈行秋楚歌未斷秋風起
一段青山一段愁

楚江清遠圖

為沈倫畫并寓九
曲山房作四首

明張羽

煙霏亂晴旭遙見西林山憶歸東湖遠人家春樹間荆
扉映水掩應待龐公還

坐愛西山翠手板方丈頤白鳥逝如彼孤雲淡若斯誰

能閒料理空滯還山期

郢水不可極荆門望漸微青山將落照偏映酒家扉
漁梁夜爭渡知是醉巫歸

潮落寒沙廣蒼然遠山暮何處
吾師歸自識門前樹披圖憶所歷
髣髴松溪渡

題燕穆之楚江秋曉圖

明陳寬

五更人語覺潮生估客帆檣候曉行
樹色未分雲夢澤雞聲已動漢陽城
天空畫角吹霜盡月落銀河入斗橫

欲問楚南千古事至今江水為誰清

楚江晴曉圖

明 吳文恭

朧朧曙光起湛湛江楓白河漢縱復橫分明見秋色天
空爽氣清露濕千峰碧微茫雲夢渚迢遞潯陽宅五柳
高且疎涼風正蕭瑟孤鶴橫江來扁舟正攜客

題鄭德彰員外所藏高彥敬畫楚江春曉圖

明 藍智

旭日未出羣山昏蒼茫楚江多白雲芳洲無人采蘅杜

落花飛絮春紛紛晴嵐滿戶漁家曉花枝髣髴聞啼鳥
巫陽夢斷三峽空湘渚愁深九疑小文彩風流高尚書
如此江山歸畫圖平湖煙靄水空濶陰壑松檜天模糊
左司郎官何處得高堂紫翠生春色是中疑有五湖人
一葉扁舟蕩空碧風塵兵革浩茫茫對此便欲歌滄浪
碧梧翠竹生高岡豈無彩鳳鳴朝陽

楚江秋曉卷

明沈周

天連湘漢水悠悠水色微茫接素秋殘月已沉三國恨

亂雲初散九疑愁
南方流落身將老
西候蕭條客倦遊
欲採蘋花恨無伴
美人迢遞隔滄洲

楚雲湘水圖歌

謝張師
變教授

元龔璠

離騷之國幾千里
十幅蒲帆順風駛
順風猶須兩月程
伊誰移來墮書几
張君墨妙游戲爾
亂峰因君接天起
蒼然古木摧不死
君應曾隱茅屋底
得非是間種蘭芷
慘澹經營那及此
松連閣上聽秋聲
讀書眼花字如蟻
玉立長身挾童子
披圖置我平生喜
憶昔詩家愛許渾

凌敲荒臺尋舊址云何姑孰大江邊望湘潭雲尺有咫
我今識君意總為詩料理雲分楚之雲水分湘之水迴
鴈夕陽街一葦山高見衡岳江遠會南紀君兮君兮可
奈何我詩敢廁屈賈壘

題晴川圖

元岑安卿

清溪粼粼生淺花曉日倒射搖金沙翩然雙鷺下危石
玉雪照影無纖瑕溪邊小景入畫圖青煙綠樹漁翁家
漁翁歸來歌未終鷺鷥忽起蘆花風回眸遙望不可極

但見白玉飛青空
昔年夜宿瀟湘浦
徹曉不眠聽急雨
解衣曳杖立沙頭
何似今朝得容與
長安馬寒泥沒腹
雪滿朝衣凍肩縮
試令援筆題此圖
長篇應賦歸來曲

清江圖

元貢性之

江驛背孤城
江流繞舍清
露枰松下奕
驛騎柳邊行
帆落晴窗影
鐘傳雨寺聲
堆牀餘簡帙
列座總耆英
燕語能留客
鷗馴解結盟
詩郵趨堠吏
衙鼓集關兵
薄俸尊仍滿
新知蓋屢傾
不才翻自媿
何以答深情

題洋江林彥禎所藏洋江春晚圖 明 陳亮

江上曉來晴春波鴨綠生山雲半斂色汀芷盡含榮野
艇乘潮去官橋隔岸橫亭中舒眺者猶有愛鵝情

太平寺水

郡人徐交畫
清濟貫河

宋 楊萬里

太平古寺劫灰餘夕陽惟照一塔孤得得未看還不樂
竹莖荒處破殿虛偶逢老僧聽僧話道是壁間留古畫
徐先紀筆今百年元師相傳妙天下壁如雪色一丈虛
徐生畫水纔盈堵橫看側看只麼是分明是畫不是水

中有清濟一線波橫貫萬里濁浪之黃河雷轟電卷儘
渠猛獨清元自不隨他波痕盡處忽掀怒攪動一河秋
色暮分明是水不是畫老眼向來元自誤佛廬化作金
栳樓銀山雪推風打頭是身飄然在中流奪得太一蓮
葉舟僧言此畫難再覓官歸江西却相憶并州剪刀剪
不得鵝溪足絹官莫惜貌取秋濤懸坐側

題馬遠十二水

明
王世貞

上帝兩帶垂長江黃河流崑崙觸天漏下貯海一杯震

澤與洞庭匯作東南漚風雲出千變日月浴雙輪泓渟
寫秋星蕭瑟競素秋木落清淺出石壓琮琤抽其細沫
貫珠巨者膏九州誰能傳此神毋乃宋馬侯解衣盤礴
初已動馮夷愁天一臆間吐派九筆底收生綃十二幅
幅幅窮琬鏤憶昔進御時陡豁神龍眸遂令大同殿濤
聲撼牀頭六宮攝其魄所以不欲留楊妹即大家女史
司校讐朱填六玉箸墨宛四銀鈎錦標賜兩府青湘潤
千秋晴牕乍開閱如練沾衣構恍作銀漢翻浸我白玉

樓當其鬱怒筆楮表騰蛟蚪及乎汨舒徐遙頸延鷺鷗
動則開智樂淵然與心謀老師鑑湖曲興盡刻溪舟左
壁余氏經右圖供卧游那能學神禹肝胝終荒丘

遠覽圖

為尹元夫乃翁
題兼與張文邦

明 廖道南

揚舲憶昔辭江國朝遊黃鶴暮赤壁五老香爐積煙紫
九華蓮葉凌空碧三山二水入金陵龍蟠虎踞高霞蒸
雨花徙倚難鳴望天界迴翔牛首登感慨浮生忽南北
春光閱盡還秋色夜宿波濤狎白龍寒棲島嶼鄰丹極

英雄聚首築黃金
況復釣天聞古音
鵬雲蔽天九萬丈
鯨海噴雪三千尋
達人
大觀忘爾我
造化遽廬無不可
劍倚層雲日月低
槎橫南斗星虹墮
君即當年尹彥明
蒼顏白髮餐芝英
雲陽山深列仙集
頓覺兩腋靈風生
羽衣翩翩千萬里
安期羨門何足齒
兩都賦就擲金聲
誰能復續張平子

江皋圖

明
李延興

江晚月未上
白煙滿芳洲
雨止山氣佳
衡扉在巖幽
浦

迴沙漫漫松聲露浮浮水田旱稻熟稍欣獲有秋曠
來清風朱夏炎敲收野人樂江居垂綸水西頭得魚送
隣家酒好仍見留童非喜相隨浩歌送飛鷗古時放達
人傲晚輕王侯焉能繫塵鞅憧憧為身謀

御定歷代題畫詩類卷五

欽定四庫全書

御定歷代題畫詩類卷六目錄

地理類

李思訓畫長江絕島圖

宋蘇軾

江山萬里圖

元王惲二首

江山萬里圖

元陳樵

江山萬里圖

元宋无

題江山萬里圖

元陶宗儀

萬里江山圖

元僧善住

萬里江山圖

明王禕

江山萬里圖

明陳秀民

千里江山圖

元李俊民

題蕭照江山圖

元柳貫

題龔翠巖江山圖

元華幼武

江山圖

明湯顯祖

題盧元佐所藏江山圖

明高遜志

題長江萬里圖後

元王惲

商學士萬里圖

元馬祖常

子久萬里長江圖

元吳鎮

題長江萬里圖

元丁復

長江萬里圖

元丁鶴年三首

題僧巨然長江萬里圖

明汪廣洋

長江萬里圖

明楊基

題夏禹王長江萬里圖

明陸完

題長江萬里圖

明唐文鳳

長江萬里圖

明楊慎

題長江萬里圖

明沈周

龐才卿畫長江圖

金趙秉文

長江圖

元牟獻

題顧氏長江圖

元戴良

題江貫道長江圖

明黃觀

題江參長江圖

明陶琛

長江偉觀圖

明錢宰

題史引之所藏長江六月圖

明顧清

題桑直閣江山勝槩圖

明王佐

江山勝覽卷

明陳振

宋駙馬王詵江山勝覽圖

明顧應祥

題江湖勝覽圖

明陳昌

題江湖勝覽卷贈李彥暉

明張和

江湖勝覽卷

明姚綸

瑩禪師房觀山海圖

唐李白

題海圖屏風

唐白居易

觀王美人海圖障子

唐梁銓

讀山海經圖

宋歐陽修

題觀海圖

元黃潛

題觀海圖

元丁復

李遵道海嶽圖

元鄭元祐

題海峰圖

明王世貞

自和因思國史燕穆之傳稱其知明州革輕悍闕

爭之俗及今海潮圖作

宋晁說之

題海昌秋潮圖

明金肅

海潮圖

宋樓鑰

海潮圖

元袁桷

題海潮圖

元柳貫

古觀潮圖

元楊維禎

題潮出海門圖

宋陳造二首

題童壽卿潮出海門圖

宋王炎

浙江潮圖

元劉因

浙江潮圖

明張以寧

錢塘江潮圖

明李東陽

錢舜舉江潮圖

明張寧

春雨晚潮圖

元吳師道

趙千里夜潮圖

元王冕

題夜潮圖

元謝應芳

為詹同文題浙江月夜觀潮圖 明劉基

李嵩宋宮觀潮圖 明張憲

題月落潮生圖 明張以寧

題閻立本職貢圖臨本 金趙秉文二首

閻立本職貢圖 金閻長言

胡虔取水蕃部圖 元虞集

題胡虔汲水蕃部圖應制 元揭傒斯

題西域圖 明陸淵

題日本僧雲山千里圖

明張以寧

題李都督朝鮮圖

明洪瞻祖

御定歷代題畫詩類卷六目錄

欽定四庫全書

御定歷代題畫詩類卷六

地理類

李思訓畫長江絕島圖

宋蘇軾

山蒼蒼江茫茫小孤大孤江中央
崖崩路絕猿鳥去惟有喬木攬天長
客舟何處來擢歌中流時抑揚沙平風
輭望不到孤山久與船低昂峨峨兩煙鬟
曉鏡開新妝舟中賈客莫漫狂小姑前年嫁彭郎

江山萬里圖 二首

元 王 惲

勝覽何人作此圖，雄誇天險亦區區。
經營意匠羣工上，慘澹風煙百戰餘。
並轡相夷嗤宋魏，舞干來遠美唐虞。
只今一統無南北，正要懷柔謹厥初。

江山列地出新圖，限隔東南見奧區。
與校廟謨雖有間，細看邊備到無餘。
忌功去玠甘捐蜀，併力亡金笑假虞。
千古美芹高議在，不應成敗論終初。

江山萬里圖

元 陳 樵

生憎李郭畫山川鑿破鴻濛混沌圓
尺地寸天都剪碎
女媧鍊石是何年

江山萬里圖

元 宋 无

咫尺寒流千萬峰
湍聲寂寂暮猿空
買船欲泛春潮雨
楚樹吳雲是畫中

題江山萬里圖

元 陶宗儀

滾滾長江出全蜀
一派波濤瀉寒玉
天設巨壑鴻濛先
厥德靈長紀南服
濫觴岷松畧巴梁
分源岨嶽走豫章

吐吞沅澧引沱滢包括洞庭納鄱陽玉壘蛾眉兩磅礴
石鏡武擔連劒閣合江西頭萬里橋漢使入吳曾駐泊
丈人拔地高青城翠浪起伏勢東傾雪山去此知幾許
一覽如隔芙蓉坪丞相祠前森老柏支機石在君平宅
浣花溪碧草堂幽越王宮殿成狼藉中巖林泉佳處多
相傳嘗栖諾詎那慈姥老龍亦共止巖阿小寺埋薜蘿
渡瀘亭對諸夷路尚疑果從何處渡魚復浦中八陣圖
前後縱橫經緯布濫灝散髮怒莫櫻黑石甍惡茶槽并

巫峽之險復愈此凝真觀前加震驚十二峰巒羅翥鳳
船過神鴉管迎送叱灘直接歸州灘自昔號為人鮓甕
黃牛廟睇黃鶴樓雲夢澤通鸚鵡洲赤壁臨皋纔尺咫
琵琶亭下蘆花秋匡廬雄尊五老立大孤小孤遙旅揖
彭郎磯前即馬當九華采石青戢戢鍾阜龍蟠奠九州
石頭虎踞當長流北固紆徐鐵甕堅金焦兩點猶浮漚
春申墓陰鵝鼻嘴角力狂瀾障厓趾煙水瀾漫豁海門
亘古朝宗從此始彼美畫師儒林英天機所到雙眼明

拂拭素繭埽玄藩
閉戶不聞風雨聲
老夫平生山水癖
白首卧游還
歷歷客持卷
軸請我觀
題詩聊復識
疇昔

萬里江山圖

元僧善住

巴水沄沄巴峽青
月明客淚墮猿聲
眼中已識瞿塘路
剌水殘山懶問名

萬里江山圖

明王禕

昔年曾作子長游
萬里江山一客舟
攬得瑰奇滿胸臆
怪來開卷思悠悠

江山萬里圖

明 陳秀民

曹郎胸中墨數斗筆下煙雲千萬重崑崙積石泰華接
瀟湘雲夢銀河通岷峨翠流三峽水衡嶽青連五老峰
清溪九曲處士屋丹霞百丈神仙宮下有臨淵欲墜之
靈石上有參天不老之長松嵐光雨氣迷遠近咫尺萬
里將無窮誰知大地山河境乃在水縑意匠中我今撫
卷三歎息畫史真能奪化工

千里江山圖

元 李俊民

筆下江山取意成一峰未盡一峰生憑誰試向行人問
水郭煙邨第幾程

題蕭照江山圖

元柳貫

荻浦楓林宿暮煙夕陽收盡月浮灣騷人一曲江南思
彈徹瑩篴送鴈還

題龔翠巖江山圖

元華幼武

山雲白白樹青青正是江南第一程却憶西津舊時路
黃沙漲滿少人行

江山圖

明 湯顯祖

地坼東南一半無
天傾西北幾雄都
秦皇不合求仙去
眼見江山是畫圖

題盧元佐所藏江山圖

明 高遜志

結茆曾住白雲間
遊宦多年客未還
開卷偶然鄉思動
數峰渾似鄂州山

題長江萬里圖後

元 王 惲

穉年屋居三十春
老境誰遣東南奔
去秋有詔待使節

北自邙衛官甌閩閩中水淺百味澹但覺草不多精神
展放江山萬里圖卷中瀟灑似堪娛寄聲故國游觀客
卜築蘇門儘可居

商學士萬里圖

元馬祖常

曹南商君儒家子身登集賢非畫史酒酣氣豪不敢使
揮灑山水在一紙咫尺萬里乾坤意人言造物真兒戲
盤紆流動各有象變化歛忽風雲至吾觀崑崙西月出
更觀扶桑東日生形勢開合限内外分野上合星辰精

大禹鑄九鼎鄒衍別九州豈但草木異乃有鬼魅憂噫
嘻奉常官祿薄百錢縫囊貯丘壑為爾作歌還一喙何
年淮南戴青箬

子久萬里長江圖

元吳鎮

一峰胸次多礪礪興寄江山尺素間南北橫分疑作限
西東倒注未曾還山圍故國人非舊水遶重城樹自閒
尤羨箇中時序換昔年禹玉豈容攀

題長江萬里圖

元丁復

天不限南北人方樂耕漁承平百年日慷慨萬里圖恍
然舊遊地浩蕩清興發放船白帝城下秋載酒黃牛峽
中月明發古夷陵為放姜詩井披秦冑修筒寒花汲空
冷湍流激柔櫓峻下荆門灘荒藤漢景廟落日還登攀
霞沈宜都驛夜宿松滋渡水色瑪瑙光鱗星粲無數荆
南亦坂郢章華猶故臺壞堤明斷鉞團沙如粟堆雨休
雲夢澤天空洞庭水曹瞞敗軍處殘灰餘故壘仙人白
雲表招手為我留待網嘉魚穴街華黃鶴樓醉來思禰

衡憤起叱黃祖不見人間來鳳皇何用筵前賦鸚鵡磯
頭若蹲虎江流多怒聲客枕不成寐已在潯陽城飛瀑
瀉銀河匡廬倚天碧遙憶義熙人黃花空好色黃陵二
女廟小姑江上頭舟人問風水幾日到揚州月色過馬
當長風沙在眼鴈投秋浦雲鴉啼戍樓晚蕪湖水東注
逆磯無迴波兩山隔江許倒浸雙青蛾抵掌女媧石浩
然歌白紵太真然犀真自愚謫仙騎鯨竟何去黃須天
子七寶鞭曾挂當塗道邊樹一百二十里樹色連長干

豪將多反覆都邑無時安金蓮曉步減玉樹朝歌闌千
載空舊迹令人起長歎天運開昌期地險亦何有年年
江上春東風入楊柳往來白下亭日夕金陵酒焚船出
金焦越賈行松維泥聞巴人婦半是吳女兒我生亦何
幸白首無亂離所願億萬年永永長如斯

長江萬里圖

元 丁鶴年

右逾越雋左蓬壺萬里提封入壯圖斷石雲屯山擁蜀
驚濤雪立海吞吳蟠桃有實來青鳥若木無枝駐赤烏

秦漢經營人盡去獨留形勢在寰區

長江萬里圖

二首

元 丁鶴年

長江千萬里何處是儂鄉忽見晴川樹依稀認漢陽
長嘯還江國遲回別海鄉春潮如有意相送過潯陽

題僧巨然長江萬里圖

明

汪廣洋

老禪好畫如好禪不到覺悟不肯息一朝縱筆恣揮灑
萬里長江落胸臆我聞大江之水出岷山漢江之水出
嶓冢兩江合流東向趨霧滃雲蒸變俄頃此圖乃獨見

源委豈與尋常畫師比地形筆勢俱兩全白壁黃金謾
堆几又聞瞿塘之險天下無江水倒瀉山模糊烏石灘
高浪濤急白帝城荒古木疎枯藤挂壁下獷狽苦竹緣
江啼鷓鴣展圖不得一見此令我扼腕長嗟吁世間好
畫豈易得討論應須待裴迪欲追太史賦遠遊直上岷
峩看晴碧

長江萬里圖

明楊基

我家岷山更西住正見岷江發源處三巴春霽雪初消

百折千回向東去江水東流萬里長人今漂泊尚他鄉
煙波草色時牽恨風雨猿聲欲斷腸

題夏禹王長江萬里圖

明陸完

雲山蒼蒼江漠漠紹興年間夏珪作珍重須知應制難
卷尾書臣字端恪却憶當時和議成偏安即視如昇平
惟開緝熙較畫史兩河淪棄無人爭斯圖似寫南朝土
還有樓臺在煙雨釣叟蓑翁不可呼漁舟野店誰能數
但覺層層境不同林泉到處生清風意遠筆精工莫比

只許馬遠齊稱雄中原殷富百不寫良工豈是無心者
恐將長物觸君懷恰宜剡水殘山也畫終思效一得愚
更把飛鴻添在圖願君且向飛鴻問五國城頭信有無

題長江萬里圖

為蜀人趙
中道賦

明
唐文鳳

一塵老屋城南隅讀書樂道非愚夫西川有客踏秋雨
訪予手把長江圖披圖細數經行處天山白積銀為樹
冰漸暖沁六月流雪波怒向三巴注蜀江溶溶遠紆迴
巨靈劈破巫峽開勢雄地東不得逞直走萬丈疑奔雷

瞿塘濫瀕天下險，巨石雙分銳磨剪。盤渦每憂巨浸深，
冷噴猶嫌急波淺。人鮪甕頭雲結愁，飢蛟晝舞寒風秋。
至喜亭邊可貰酒，秬歸縣前仍艤舟。荆湘蕩漾平於掌，
蒲帆箭疾飛雙槳。蒼龍山露翠煙中，白虹水接銀河上。
岳陽樓高明月光，仙人踏破鶴背霜。玉簫吹碎丹鳳語，
寶劍拭動青蛇光。洞庭茫茫接彭蠡，千里相望同尺咫。
無情五老蒼顏凋，含羞二姑黛鬟美。揚瀾瀾瀾鄱湖寬，
水府馮夷嚴守闕。明珠泣墜淵客怨，冰綃織就鮫人閒。

嶠磯秉靈孫小女冷風條度神巫語客回盡望江東雲
鳥歸帶得淮南雨須臾放棹下金陵蓬萊宮闕高峻增
聖人黃衣御宸極紫霧衝霄王氣騰浪游歷記萬餘里
聖夢驚魂幾悲喜江花江水興無涯點染丹青煩畫史
賦詩題畫心悠然才思逸發如湧泉酒酣擊節唾壺缺
醉和少陵雲錦篇

長江萬里圖

明
楊慎

五才坎德迴靈長萬里岷山始濫觴流漢天迴經豔瀕

盤渦谷轉下柴桑揚瀾左蠡曾潭府大壑歸虛廣莫鄉
天遣陽侯分淼淼帝咨神禹畫茫茫青岑翠觀鮫人館
水碧金膏龍伯堂景浴陽烏朝旭早燄然陰火夜霞光
煙寒星散三洲樹風駛雲飛百尺檣鶴子鳬雛喧澍雨
紋螺錦蚌映翔陽籠筒津鼓驚浮客欸乃漁歌屬漫郎
泗磬石鍾鏘島嶼輕連蘋影媚滄浪投鞭堪笑苻堅策
靜練難賡謝朓章彩鷁退飛休借問白鷗浩蕩信徜徉

題長江萬里圖

為郭
總戎

明
沈周

元戎大開寶繪堂紫錦薦几霞幅張手披牛腰之甲卷
水墨迤邐蹤微茫我從魚鳧弔往古灌口玉壘煙蒼涼
青城雪山蔽虧處導江之岷不可望三水合流錦官當
三娥九頂遞接翠樓觀縹緲天中央渝涪城高宛相峙
嘉陵姚江吹枕傍陣迹齒齒石作行風雲慘澹開瞿唐
黃牛豔潁難升航青天仰漏一線光峽窮江廣見漢陽
黃鶴赤壁相低昂廬山五老天下觀順流漸見迎風檣
大姑小姑交嫵媚何年爭嫁彭家郎三山九華連建康

南都宮闕何煌煌大明定鼎龍虎合萬古鞏固皇圖昌
真州潤州列兩廂金焦葉巖當喉吭直吞天派納海口
有若萬邦來會王座中指點皆厯厯綃數文萬里長
老夫困頓今白首欲往遊之無粟糧徒然感慨在牖下
捕影捉風消熱腸心搖搖兮悵徬徨佩有蘭兮襲瑤芳
江兮漢兮不可度望美人兮天一方少陵東坡二豪者
風流在在留文章英雄割據未暇論卧龍獨數人中強
元戎元戎將之良此卷兼與韜鈴藏南征西伐或有事

按圖索程猶取囊非惟供翫託深旨居安慮危心不忘
嗚呼居安慮危心不忘

龐才卿畫長江圖

金趙秉文

青山隱隱水悠悠何處長江是盡頭欸乃一聲人不見
忽從天際下歸舟

長江圖

元牟獻

漢川影落鸚鵡洲金山鐘到多景樓老龍幾載卧寒碧
中間不斷萬古流晚來雪浪大如屋澎湃舞我一葉舟

舟移岸轉知何處離離煙草令人愁說與渠儂莫倚柁
轉帆別浦盡少休此圖此景俱可惜展翫不足空白頭
家住江水發源處何時還我舊菟裘

題顧氏長江圖

元戴良

天下幾人畫山水虎頭子孫世莫比何年寫此長江圖
多少江山歸筆底巴陵三峽天所開遠勢似向岷峨來
洞庭瀟湘僅毫末楚客湘君安在哉江上一朝風雨急
老我曾來踏舟立鼓枻既聞潭畔吟抱琴復聽竹間泣

別來幾日世已非忽此披圖憶曩時
早知避地多處所肯逐紅塵千里
歸林下一夫巾屨似亦有舟人與
漁子能添野老煙波裏便與同生
復同死

題江貫道長江圖

明黃觀

離離衆樹深靄靄孤雲碧山色望
難窮江流浩無極漁歌遠渚昏鳥
下平蕪夕惆悵起風波扁舟何處
客

題江參長江圖

明陶琛

石出夜潮落山明寒霧消江空千
里擢邗迴一歸樵樹

色連沙嶼人家傍野橋還同舊樓地風景日蕭蕭

長江偉觀圖

明 錢 宰

第一江山獨凭闌秋風斷石倚江闕兩峰並立星河上
一水中流天地間海日東生月西沒官船北去客南還
莫愁白髮搔來短酒落金盤入醉顏

題史引之所藏長江六月圖

明 顧 清

長松泠泠生畫寒高巖側綴青琅玕陽坡宛轉行朱闌
青莎滑膩碧鮮斑紅橋直走凌驚湍下接孤嶼高巔阮

隔江青山如伏獬柴扉草堂相對安漁舟縹緲青林端
樵童牧叟時往還羣山忽斷百里寬青蒲綠藻縈微瀾
臨江飛閣叢井幹江流石角隨彎環前山轉深勢未殘
層崖複磴勞躋攀上方寂寞空禪關平林演迤臨江干
江迴山盡路險艱飛梁側卧波潺潺江流自此入渺漫
遙山一抹天際看東京畫史真高閒故將山水窮環觀
岷峨嘉陵遠莫殫九華落星揚子灣晴洲歷歷被芳蘭
美人不來空浩歎疾風吹塵暗燕山金星龍尾冰攢攢

燐熊熾豹光赫殷為君炙兔埽冰紈君歸終日山水間
肯憶羸馬隨朝班

題桑直閣江山勝槩圖

明王佐

我昔趨神京道出匡廬峰手持綠玉杖遍踏金芙蓉是
時秋高天氣肅最愛秋聲滿巖谷萬頃湖光帶白蘋九
疊屏風挂飛瀑結果便欲棲雲間變龍趨赴羣鴻鸞才
名用世果何有羸得歸來雙鬢斑至今夢想煙霞趣擬
托毫縑寫情素君家此圖誰所模似我當時舊遊處遠

山縹緲如游龍好處盡在煙嵐中晴波落日曳澄練枯
林老葉鳴秋風屠蘇高下林間起水色山光畫圖裏軟
紅無路到柴扉空翠常時撲書几中流放棹知何人錦
袍坐岸方烏巾若非高潔魯連子應是風流賀季真我
生垂老願未酬魯人豈識東家丘圖中勝槩倘易致使
從此地營菟裘

江山勝覽卷

明陳振

維揚有客思飄飄歷覽山川不憚遙巫峽秋清雲夢雨

吳門夜月浙江潮北瞻燕冀天應近西渡嶽函雪未消
到處幽奇看不盡更收餘興入詩瓢

宋駙馬王詵江山勝覽圖

明
顧應祥

王郎妙手絕代無生綃寫出江山圖飄揚天趣入三昧
點染意象爭錙銖遠山模糊近山碧澄江一帶橫秋色
老樹參差曲岸妨迴波搖蕩崩隄仄人家臨水盡開門
儼如雞犬聲相喧萬杉路隔煙霧洞獨木橋通楊柳邨
忽然突起作險狀兩厓怪石森屏障峰迴麓轉勢復平

賈舶漁舟互來往樓臺隱隱雲中起疊嶂層巒青未已
風帆渺渺天際來咫尺渾同千萬里

題江湖勝覽圖

明陳昌

馬卿子清而臞狂非迂非迂不愛養浮丘伯之黃鶴
不愛釣任公子之巨魚年來只愛江湖居江湖風月足
清興筆牀茶竈尋常俱船頭紅拂唱已曲船尾黃帽歌
吳歈歌吳歈唱已曲妙舞清商間絲竹白日歡游殊未
足復擬黃昏秉銀燭風帆催送寒山鍾直向垂虹橋下

宿

題江湖勝覽卷贈李彥暉

明張和

萬里一孤舟常年事勝遊
星河三峽夜煙樹五湖秋跡
擬玄真子名齊博望侯
翻憐蓬華士白首卧林丘

江湖勝覽卷

明姚綸

江湖隨處豁吟眸不滿書囊卒未休日下風雲瞻魏闕
淮東歌舞認揚州一蓬疎雨鷗邊晚千里殘霞鷺外秋
見說武昌城畔柳尚含青眼待重遊

瑩禪師房觀山海圖

唐李白

真僧閉精宇滅跡含達觀
列障圖雲山攢峰入霄漢
丹崖森在目清晝疑卷幔
蓬壺來軒窗瀛海入几案
煙濤爭噴薄島嶼相凌亂
征帆飄空中瀑水灑天半
崢嶸若可陟想像徒盈歎
杳與真心冥遂詣靜者翫
如登赤城裏揭步滄洲畔
即事能娛人從茲得蕭散

題海圖屏風

唐白居易

海水無風時波濤安悠悠
鱗介無小大遂性各沉浮
突

元海底鼇首冠三神丘釣網不能制其來非一秋或者
不量力謂茲鼇可求巔負牽不動綸絕沉其鈎一鼇既
頓頷諸鼇齊掉頭白濤與黑浪呼吸繞咽喉噴風激飛
廉鼓波怒陽侯鯨鯢得其便張口欲吞舟萬里無活鱗
百川多倒流遂使江漢水朝宗意亦休蒼然屏風上此
畫良有由

觀王美人海圖障子

唐 梁 鉉

宋玉東家女常懷物外多自從圖渤海誰為覓湘娥白

鷺栖脂粉頰
魴躍綺羅仍
憐轉嬌眼
別恨一橫波

讀山海經圖

宋 歐陽修

夏鼎象九州
山經有遺載
空蒙大荒中
杳靄羣山會
炎海積鼓蒸
陰幽異明晦
奔趨各異種
倏忽俄萬態
羣倫固殊稟
至理寧一槩
駭者自云驚
生兮孰知怪
未能識造化
但爾披圖繪
不有萬物殊
豈知方輿大

題觀海圖

元 黃潛

昔年解纜岑江上
初日團團水底紅
鼉吼忽搖千尺浪

鷗飛仍挾半帆風
遙看島嶼如星散
祇謂神仙有路通
及此棲身萬人海
舊遊却在畫圖中

題觀海圖

為張晉
賢作

元丁復

自古十洲三島勝
幾時一釣六鼉連
千年王母蟠桃實
五百童兒採藥船
日出早看金柱湧
天空只擬玉壺懸
乘查欲接張公子
直到牽牛織女邊

李遵道海嶽圖

元鄭元祐

李黃巖疎著瘦體
滿臆秋蘄蘄似厭
分符磻谷底折腰

督郵面皺鬚毵毵竟騎鯨魚上天去帝憫人間留不住
乃令筆底飛墨如雲霧王維鄭虔本有素早年臨摹米
顛海嶽圖黃巖非有顛非無庵空月落山木擁是中疑
有窮猿呼二子風流俱不泯寶月夜夜生珊瑚

題海峰圖

為故金同
文先生作

明
王世貞

六龍既失守十洲俄半摧蒼然東海色忽墮二峰來插
雲斗柄出浴日扶桑開停琴聽洪濤乘桴問九垓魯連
無世念安期有仙才高踪不可即披圖良快哉

自和因思國史燕穆之傳稱其知明州革輕悍鬪

爭之俗及今海潮圖作

宋晁說之

燕公未肯祖虛無悍俗歸仁舉國書莫道邦人都背德
壁間猶有海潮圖

題海昌秋潮圖

明金肅

不信滄溟外奇觀尺幅收驚濤
石壁匹練鎖炎州沃日天疑近鞭雷地欲浮
探微留妙墨長作廣陵秋

海潮圖

宋樓鑰

錢塘佳月照青霄壯觀仍看半夜潮每恨形容無健筆
誰知收拾在生綃蕩搖直恐三山沒咫尺真成萬里遙
金闕名堯天尺五海王自合日來朝

海潮圖

元 袁 桷

銀潢清淺瑞星輝的的秋光下紫微欲識潮音真實相
落迦山畔五銖衣

題海潮圖

元 柳 貫

巨魚吞吐不知勞千古靈胥氣尚豪夜半西風搓信到

銀蟾初挂海門高

古觀潮圖

元楊維禎

八月十八睡龍死海龜夜食羅刹水須臾海壁龕赭門
地卷銀龍薄于紙艮山移來天子宫宮前一箭隨西風
劫灰欲死蛇鬼穴婆留朽鐵猶爭雄望海樓頭誇景好
斷鼉已走金銀島天吳一夜海水移馬蹠沙田食沙草
崕山樓船歸不歸七歲呱呱啼軹道

題潮出海門圖

二首

宋陳造

絕島平岡捲欲空
兩崖相對屹穹崇
即今畫手兼詩筆
更與江山角長雄

卷裏濤波快一披
蒼山踴起雪山馳
浮天沃日無窮意
到我春窗病酒時

題童壽卿潮出海門圖

宋王炎

潮來濺雪欲浮天
潮去奔雷又寂然
海上兩山元不動
更添此意畫中傳

浙江潮圖

元劉因

山人懶絕夢亦然鼎如萬牛不可遷誰信畫工筆頭有
神力扁舟一夜江聲寒覺來千里雪漫漫中有數點青螺
閒人間天門壯觀已如此豈知大塊喘息四海如鼻端
海中仙人冰雪顏吸風御氣非人寰試問濤頭何當還
為我寄聲三神山我欲乘興遊其間

浙江潮圖

明
張以寧

浙江亭下彩舟開雪滿青天白晝雷聞說祇今亭上月
夜寒常照暗潮來

錢塘江潮圖

為喬少卿
希大作

明 李東陽

錢塘江頭江倒流中有潮聲號萬牛堆銀如山雪如屋
遠影滅沒當空浮千峰將顏樹欲禿海若股栗天吳愁
來船歡欣勢自下瞬息千里無淹留去船乘危貴得正
力盡一過且復休躋攀分寸偶失守頃刻下飽黿與鱉
由來咫尺不自覺遠望不敢凝雙眸客來未到膽已落
借問同行還見不何人嬉笑欲起舞越東老翁搔白頭
羣兒招呼或助叫倏忽過耳風颼颼達士遐觀得奇賞

七澤五湖同一漚。天道虛疑月盈缺。世情妄假人恩讎。
復將險巧作戲劇。鄉里少年誇善汨。潮來潮去亦何意。
人間萬事良悠悠。我時渡江不相值。空向燕客談杭州。
壯懷高興兩莫遂。三十五年秋復秋。誰將妙思入畫本。
似與造化爭雕鏤。酒酣月落不知處。夢醒尚作江南遊。

錢舜舉江湖圖

明張寧

錢塘江上怒潮來。萬里天風動地雷。白馬素車應浪說。
吳王宮闕已成灰。

春雨晚潮圖

元 吳師道

昔年曾看錢塘潮，龍山山下乘春濤。
中流回首洲渚變，孤塔不動青厓高。
雲昏水暗雨陣黑，雪噴電轉潮頭白。
浙江亭遠亂帆飛，西興渡暝千花濕。
空江茫茫魂欲斷，歸來十年今復見。
浩蕩春風滿畫圖，淋漓海氣飛人面。
春深故國芳草生，鴟夷遺恨何時平。
重游弔古惜未得，掩卷歌罷空含情。

趙千里夜潮圖

元 王冕

去年夜渡西陵關待渡元立江上灘灘頭潮來倒雪屋
海面月出行金盤冰花著人如撒霰過耳斜風快如箭
叫雪鴻鴈零亂飛正是今年畫中見寒煙漠漠天冥冥
展翫陡覺心神清便欲吹簫騎大鯨去看海上三山青

題夜潮圖

元
謝應芳

昔余夜醉錢塘酒看潮八月中秋後銀山湧出海門來
潮聲般若雷霆吼此圖之作知幾年當時景物皆依然
雲山兩岸澹籠月雪岸一江高拍天一觀頓覺毛髮立

再觀祇恐衣裳濕扁舟漁子任掀舞別渚鷗鳬自翔集
奔騰澎湃無足驚人間平地風波生乘桴尼父果浮海
從遊我欲跨長鯨

為詹同文題浙江夜月觀潮圖

明

劉基

君不見四時平分成歲功以秋繼夏獨不同炎官挾長
握天柄七月赤日熺玄穹尋收抱鉞蹲白水野氣赫赫
攄赭虹陽侯喘汗河伯喝少昊上訴愁天公會須萬物
長養遂斯以仲月虛宵中此夜姮娥魄正滿命駕四蟾

驂兩馭指揮禺强出玄渚蕩滌歌煇清靈蒙河漢發源
牛斗下曲江上與天津通初看一髮起溟徼如曳組練
來於東漸聞殷駢鼉鼓發倏忽萬雷聲撼風天吳掉尾
出溟滓馬銜揚鬐招海童霓旌縞帳驚羽幃瑤臺十二
浮空濛蕊珠仙人乘玉輅騰駕鶴鵠飛氄氄長庚欵霍
挾光耀靈母扶龍嗥戛銅宓妃起舞素女從瓊珮綵綵
雲旖旎冰綃霧縠紛颺纚霜旂雪旂高翳空鯨魚呀呿
蛟鰐遁蒲牢哮吼馮夷宮瞿塘巫峽起平地豔瀕若象

塵回深先驅已過赤亭嶂後從始發龕山硤商聲爽浙
合羣籟澤國凜凜寒欲凍先生翫月坐樓上夜氣澄寂
神和冲憑闌快覩煩暑退呼兒命酒澆喉嚨自舞自歌
歌自作月照白髮三千總歌聲迤颺林壑應竹樹戛擊
絲與桐淵魚躍波棲鳥作紫柱繞屋清香融君歌曲終
響未終我歌激烈留征鴻睽眸相視俱老矣況有衆病
來交攻聖明天子御宇宙威惠與天相比隆首丘儻許
謝鞿絆猶有古月光腫龐行當唱和三百首永與潮汐

流無窮

李嵩宋宮觀潮圖

明張憲

磁州夜走泥馬駒卧牛城中生綠蕪炎精炯炯照吳會
大築錢塘作汴都玉殿珠樓連翠閣七寶簾櫳敞雲幙
生移艮岳過江南不數東京舊帷樂茂樹盤盤迷綠雲
龍飛鳳舞峰巒奔玉牀下壓大江小海水正入東華門
木樨花開秋可數統統靈鼉振天鼓海門一線截江來
雪壁銀城畫飛舞吳商楚估千萬艘黃龍戰船頭尾高

豈無海道走中土長驅逐北乘風濤煙霧蒼蒼繞城郭
屋瓦魚鱗互參錯百萬驕民事醉醺坐使中原厭羊酪
因循六帝不復讎西風八月凭江樓攢宮人飲白骨恨
洪波不洗青衣羞邦基削盡師臣逐軹道人降子嬰哭
繡胸文頸踏浪兒回首誰能報君辱廟子沙頭卓大旗
天吳縮頸不敢馳行人指塔話揚璉三十六宮秋草飛

題月落潮生圖

明
張以寧

參橫天末樹陰收風響蘆根海氣浮笑語漸聞燈漸近

誰家江上早歸舟

題閻立本職貢圖臨本

二首

金

趙秉文

周王職貢朝萬邦
右相丹青古無雙
好本不應天下獨
解如明月印千江

金羣勢面覩天庭
王會圖中見典刑
已了宣威沙漠事
更煩右相寫丹青

閻立本職貢圖

金

閻長言

諤諤昌周此一書
形容葵貢寫成圖
寧知右相無深意

莫指丹青便厚誣

胡虔取水蕃部圖

元虞集

駝車度磧輒三日老馬跑沙泉水溢橐囊盛滿不辭勞
徼外天山雪千尺君不見聖明天子恩澤多旁及四海
猶翕河昆蟲草木感餘潤日獻醴泉甘露歌

題胡虔汲水蕃部圖應制

元揭傒斯

沙磧茫茫塞草平沙泉下馬滿囊盛曾於王會圖中見
真向天山雪外行聖德只今包宇宙邊庭隨處樂農畊

生綃半幅唐人筆留與君王駐遠情

題西域圖

明
陸淵

自從博望通西域唐代諸豪最盛強今日玉門關外路
不須請組繫名王

題日本僧雲山千里圖


明
張以寧

天東日出天西入萬里蚪鱗散原隰日東之僧渡海來
袖裏江山雲氣濕願乘雲氣朝帝鄉大千世界觀毫芒
却騎黃鶴過三島別後扶桑枝葉老

題李都督朝鮮圖

明 洪瞻祖

王者安天下終資不戰功
金城圖略上青海戍樓空
長
笛關山月寒砧木葉風
還將憂國淚添入錦題中



御定歷代題畫詩類卷六